

# Schnitzelbank 2018 | Turnverein Wollerau-Bäch [www.stvwb.ch](http://www.stvwb.ch)

En huufe Geld go scheffle, Egoiste-Buebe,  
Banke, WEF und Spitex chönd wäg dem nöd ruebe,  
gäg so vil chaltem Ego wänd mir Wärmi bringe,  
und jetzt denn eu es heisses Schnitzelbänkli singe!

«Mir wänd Erfolg und müend drum luege uf die Riiche.»  
das seit de Haui, d'Priise stiiged, immer s'gliiche,  
jetzt checkt au er, «nöd guet, nur Riichi anezüchte»,  
drum gsesch de Haui s'letscht Johr uf Einsiedle flüchte!

Billag NO or YES de Kuprecht s'arme Tröpfli,  
druckt doch im Ständerat denn grad uf s'falsche Knöpfli,  
tuet er diheime ächt au s'falsche Knöpfli drücke,  
und sich mit Bachelorette statt Tagesschau beglücke!

Au s'Mutti Merkel hört nöd uf politisiere,  
tuet nebe Düütschland forsch au d'EU mitregiere,  
mir fürchtet bald emol en Art Regierigskoma,  
wil us EurOPA wird so immer meh EurOMA!

Lueg is Land dänn gsesch die Jodler machet Sache,  
en Tombola tüend sie fürs Jubiläum mache,  
doch s'git nur Gwünner und Verlüürer a de Tische,  
will d'Jodler händ nöd gmerkt dass d'Lösli sötted mische!

De Verenahof de tuet bi Mini Beiz mitmache,  
de Beni Diethelm gsesch zur Chuchi use lache,  
als Rechte choch er regional, seit er erotisch,  
doch uf em Teller alli Frücht die sind exotisch!

D'Postauto buechet falsch, tüend Gelder umeschichte,  
und d'Chefin Ruoff die lügt, tuet ihre Ruef vernichte,  
kei Subventionen bschisse, mir wänd d'Ehr bewahre,  
und gönd drum nur no mit em Bamert-Bus go fahre!

Zum Stadelmaa i d'Roos do gönd sie gern go suufe,  
de Säckelmeischer und no ganz en wilde Huufe,  
er bislet über d'Steimuur ab, es tuet im wohle,  
doch Schwupp und d'Füürwehr mues ne us em Bachbett hole!

Würscht i de Theke und verrusse au zum grille,  
so kennt me d'Metzg, doch jetzt isch's wieder nüm zum chille,  
immer de Stunk und Meis, es überladets Fueder,  
es gseht det us als seiged d'Würscht au no am Rueder!

De Fürtitobelweg isch fertig, s'git es Fäschтли,  
im Bächlipark am Samstag früeh d'Lüt sind im Näschtli,  
die Krebsbachmusikante wänd das mer's tuet lobe,  
drum tüend's im Stägehuus scho früe am Morge probe!

En lahmi Red vom Trömp z'Davos, so gar nöd gschliffe,  
me hät de Idruck gha, de Typ seg high vom Kiffe,  
vermutlich isch er mit em Heli falsch abboge,  
und z'Reichenburg z'nöch über d'Hanfplantage gfloge!

«No Billag» chund vo sore Kesslersche Hirnwinding,  
me chönt au säge grad e hiesigi Erfindig,  
dass nöd no meh passiered so skurili Sache,  
sött me mit Bildungszentrum endli fürsi mache!

Scanne den QR Code  
um die Bilder auf dein  
Handy zu sehen!

